

四庫全書

子部

欽定四庫全書

子部

古今事文類聚前集卷四十一

詳校官中書_臣康綸鈞

侍讀_臣孫球覆勘

總校官編修_臣王燕緒

校對官編修_臣沈清藻

謄錄監生_臣張樹幟

欽定四庫全書

古今事文類聚前集卷四十

宋 祝穆 撰

技藝部

畫者

羣書要語子曰繪事後素曰禮後乎八唐虞畫像而民

不犯

前武

以五采彰施於五色

益

白受采

禮

爰變丹青

揚吾

畫虎不成反類狗

馬援

諸太幻師求太陰精用和

幻藥是諸師等手執方諸承月中水周禮注鏡謂之方

諸

楞嚴經

畫有六法一曰氣韻生動二曰骨力用筆三曰

應物象形四曰隨類賦彩五曰經營置位六曰傳移模

寫

畫品

詩句方諸承水調幻藥灑落生綃變寒暑

荆公

古文事實

解衣槃礴

宋元君將畫圖衆史皆至舐筆和墨在外者半有一史

後至者儻儻然不趨受揖不立因之舍公使人視之則解衣槃礴羸君曰可矣是真畫者也

莊子

誤墨畫蠅

曹不興善畫吳主使不興畫屏風墨落點素因就以作蠅既御權以為生蠅舉手彈之

吳興雜錄

發厨取畫

顧長康曾以一厨畫糊題寄桓玄皆其所珍惜者玄乃發厨取之封題如初畫並不存直云妙畫通靈變化而

金史卷之四十一
卷四十
去了無恠色

世說

觀畫施錢

顧愷之建康寶錄注云京師寺記興寧中瓦棺寺初置僧衆設會請朝賢鳴刹注疏其時士大夫無有過十萬者既至長康直打刹注一百萬長康素貧時以為大言僧後寺成請勾疏長康曰宜備一壁遂閉戶往來一百餘日畫維摩一軀工畢將欲點眸子謂寺僧曰第一日開見者責施十萬第二日開可五萬第三日可任例責

施及開戶光明照寺施者填咽俄而果百萬錢也

藝文類聚

引世說愷之為虎頭將軍今世說不載名書記云小字虎頭

登樓罕見

顧愷之建層樓為畫所疾風暴雨烈暑祁寒並不下筆

炎涼皆過天地明朗時乃染毫登樓去梯妻子罕見

南齊

謝奕畫品

點睛龍飛

張僧繇於金陵安樂寺畫四龍不點睛每云點之即飛

去人以為誕妄因點其一須臾雷霆破壁一龍乘雲上天一龍不點眼者見在

水衡記

閻立本觀張僧繇江陵畫

壁曰虛得名爾再往曰猶近代名手也三往於是寢食其下數日而後去夫閻以畫名一代其於張高下間爾而不足以知之世之人強其不能而論能者之得失不

亦疎乎

後山談叢

油污其畫

桓玄好蓄法書名畫客至嘗出而觀客食寒具而油污

其畫後遂不設寒具集韻寒具餠餅也

劉禹錫嘉話

誤墨畫牛

晉王獻之桓溫嘗使書扇墨誤落因畫作烏犢駁牛甚妙

羞為畫師

太宗與侍臣泛舟春苑池見異鳥容與波上悅之詔坐者賦詩而召閤立本侔狀閤外傳呼畫師閤立本是時已為主爵郎中俯伏池左研吮丹粉望坐者羞恨流汗

歸戒其子曰吾少讀書文辭不減儕輩今獨以畫見名
與廝役等若曹慎毋習本傳

鄭虔三絕

唐鄭虔善圖山水嘗自寫其詩并畫以獻帝大署其尾
曰鄭虔三絕

觀畫地獄

吳道玄字道子畫地獄變相後成都人來觀咸懼罪脩
福田兩市屠沽魚肉不集

朱景元
畫斷

取軸棄畫

王涯居永寧里名書畫以金玉為奩軸鑿垣貯之重複
固祕及被誅為人破垣剔取奩軸金玉而棄其書畫於
道

襲父兄業

毛稜惠遠子便達有餘真巧未足若比其父則床上疊
牀隋法倫筆調精密方之厥兄恐屋下架屋

續畫品

畫見夜隱

太宗朝李王獻畫羊畫則鬻草欄外夜則歸卧欄中莫曉其理僧贊寧曰此幻藥所畫南海倭國有蚌淚和色着物畫見夜隱沃焦山石磨色染物畫隱夜見

海外記

啜茶觀畫

經筵承受張茂嘗招講官啜茶觀畫程明道先生曰吾平生不啜茶亦不識畫竟不往

龜山語錄

王墨山水

王墨善潑墨號王墨善畫酒酣之後先以墨潑絹腳踏

手捫隨其形象為山為水為石為樹倏忽造化不見墨

汚之處

畫斷

黃筌畫花

黃筌父子畫花妙在賦色用筆極細殆不見墨迹但以輕色染成謂之寫生江南徐熙以筆畫之殊草草畧施丹粉而神氣迥出別有生意筌惡其軋已言其粗俗不入格罷之熙之子乃效諸黃格更不用墨筆直以彩色圖之謂之沒骨圖筌不復能疵瑕遂得齒院品然其氣

韻皆不及熙遠甚

崔白翎毛

崔白濠梁人攻畫雖以敗荷鳬鴈得名然尤精花竹翎毛

惠崇小景

僧惠崇建陽人工畫鵝鴨鶩尤工小景善為寒汀煙渚

瀟灑虛曠之狀又工詩

荆公詩注

古今文集

雜著

畫記

韓愈

雜古今人物小畫共一卷騎而立者五人騎而被甲載兵立者十人一人騎執大旗前立騎而被甲載兵行且下牽者十人騎且負者二人騎執器者二人騎擁田犬者一人騎而牽者二人騎而驅者三人執羈勒立者二人騎而下倚馬臂隼而立者一人騎而驅涉者二人徒而驅牧者二人坐而指使者一人甲冑弓矢鈇鉞植者

七人甲冑執幟植者十人負者七人偃寢休者二人甲
冑坐睡者一人方涉者一人方涉坐而脫足者一人寒
附火者一人雜執器物役者八人奉壺矢者一人舍而
具食者二十有一人挹且注者四人牛牽者三人驢驅
者四人一人來而負者婦人以孺子載而可見者六人
載而上下者三人孺子戲者九人凡人之事三十有
二為人大小百二十有三而莫有同者焉馬大者九匹
於馬之中又有上者下者焉行者牽者奔者涉者陸者

翹者頤者鳴者寢者訛者立者齧者飲者溲者陟者降
者痒磨樹者噓者嗅者喜而相戲者怒相踉蹌者抹者
騎者驟者走者載服物者載狐兔者凡馬之事二十有
七為馬大小八十有三而莫有同者焉牛大小十有一
頭駝三頭驢如駝之數而加其一馬隼一犬羊狐
兔麋鹿共三十旃車三兩雜兵器弓矢旌旗刀劍矛楯
弓服矢房甲冑之屬餅盞筮筐篋錡釜飲食服用之
器壺矢博奕之具二百五十有一皆曲極其妙貞元甲

成年余在京師甚無事同居有獨孤生申叔者始得此
畫而與余彈碁余幸勝而獲焉意甚惜之以為非一工
人之所能運思蓋叢集衆工人之所長耳雖百金不願
易也明年出京師至河陽與二三客論畫品格因出而
觀之座有趙侍御者君子人也見之蹙然若有所感少
而進曰噫余手之所摹也亡之且二十年矣余少時常
有志乎茲事得國本絕人事而摹得之遊閩中而喪焉
居間處獨時日往來余懷也以其始為之勞而夙好之

篤也今雖遇之力不能為已且命工人存其大都焉余
既甚愛之又感趙君之事因以贈之而記其人物之形
狀與數而時觀之以自釋焉

寶繪堂記

蘇子瞻

君子可以寓意於物而不可以留意於物寓意於物雖
微物足以為樂雖尤物不足以為病留意於物雖微物
足以為病雖尤物不足以為樂老子曰五色令人目盲
五音令人耳聾五味令人口爽馳騁田獵令人心發狂

然聖人未嘗廢此四者亦聊以寓意焉耳劉備之雄才也而好結髦嵇康之達也而好鍛阮孚之放也而好蠟屐此豈有聲色臭味也哉而樂之終身不厭凡物之可喜足以悅人而不足以移人者莫若書與畫然至其留意不釋則其禍有不可勝言者鍾繇至以此嘔血發冢宋孝武王僧虔至以此相忌桓玄之走舸王涯之覆壁皆以兒戲害其國凶其身此留意之禍也始吾少時嘗好此二者家之所有惟恐其失之人之所有惟恐其不

吾予也既而自笑曰吾薄富貴而厚於書輕死生而重
畫豈不顛倒錯謬失其本心也哉自是不復好見可喜
者雖時復蓄之然為人取去亦不復惜也譬之煙雲之
過眼百鳥之感耳豈不欣然接之然去而不復念也於
是乎二物者常為吾樂而不能為吾病駙馬都尉王君
晉卿雖在戚里而其服被禮義學問詩書常與寒士角
平居攘去膏粱屏遠聲色而從事於書畫作寶繪堂於
私第之東以蓄其所有而求文以為記恐不幸而類吾

少時之所好故以是告之庶幾全其樂而遠其病也熙寧年月日記

文與可畫筴當谷偃竹記 蘇子瞻

竹之始生一寸之萌耳而節葉具焉自蜩螻蛇蚶以至
于劒拔十尋者生而有之也今畫者乃節節而為之葉
葉而累之豈復有竹乎故畫竹必先得成竹於胸中執
筆熟視乃見其所欲畫者急起從之振筆直遂以追其
所見如兔起鶻落少縱則逝矣與可之教予如此予不

能然也而心識其所以然而不能然者內外不一心手
不相應不學之過也故凡有見於中而操之不熟者平
居自視了然而臨事忽焉喪之豈獨竹乎子由為墨竹
賦以遺與可曰庖丁解牛者也而養生者取之輪扁斲
輪者也而讀書者與之今夫夫子之託於斯竹也而予
以為有道者則非耶子由未嘗盡也故得其意而已若
予者豈獨得其意并得其法與可畫竹初不自貴重四
方之人持練素以請者足相躡於其門與可厭之投諸

地而罵曰吾將以為韞士大夫傳之以為口實及與可
自洋州還而余為徐州與可以書遺余曰近語士大夫
吾墨竹一派近在彭城可往求之韞材當萃於子矣書
尾復寫一詩其畧曰擬將一段鵝雞絹掃取寒梢萬尺
長予謂與可竹長萬尺當用絹二百五十匹知公倦於
筆硯願得此絹而已與可無以答則曰吾言妄矣世豈
有萬尺竹也哉余因而實之答其詩曰世間亦有千尋
竹月落庭空影許長與可笑曰蘇子辯則辯矣然二百

五十匹吾將買田而歸老焉因以所畫簣當谷偃竹遺
予曰此竹數尺耳而有萬尺之勢簣當谷在洋州與可
嘗令予作洋州三十韻簣當谷其一也予詩云漢川脩
竹賤如蓬斤斧何曾赦籜龍料得清貧饒太守渭濱千
畝在胷中與可是日與其妻游谷中燒筍晚食發函得
詩失笑噴飯滿案元豐二年正月二十日與可沒於陳
州是歲七月七日予在湖州曝書畫見此竹廢卷而哭
失聲昔曹孟德祭橋公文有車過腹痛之語而予亦載

與可疇昔戲笑之言者以見與可於予親厚無間如此也

書蒲永昇畫後

蘇子瞻

古今畫水多作平遠細皴其善者不過能為波頭起伏使人至以手捫之謂有窪隆以為至妙矣然其品格特與印板水紙爭工拙於毫釐間耳唐廣明中處士孫位始出新意畫奔湍巨浪與山石曲折隨物賦形畫水之變號稱神逸其後蜀人黃筌孫知微皆得其筆法始知

微欲於大慈寺壽寧院壁作湖灘水石四堵營度經歲
終不肯下筆一日倉皇入寺索筆墨甚急奮執如風須
臾而成作輸瀉跳蹙之勢洶洶欲崩屋也知微既死筆
法中絕五十餘年近歲成都人蒲永昇嗜酒放浪性與
畫會始作活水得二孫本意自黃居寀兄弟李懷素之
流皆不及也王公富人或以勢力使之永昇輒嘻笑捨
去遇其欲畫不擇貴賤頃刻而成嘗與余臨壽院水作
二十四幅每夏日掛之高堂素壁卽陰風襲人毛髮為

立永昇今老矣畫亦難得而世之識真者亦少如往時董羽近日常州戚氏畫水世或傳寶之如董戚之流可謂死水未可與永昇同年而語也

書吳道子畫後

蘇子瞻

智者創物能者述焉非一人而成也君子之於學百工之於技自三代歷漢至唐而備矣故詩至於杜子美文至於韓退之書至於顏魯公畫至於吳道子而古今之變天下之能事畢矣道子畫人物如以燈取影逆來順

往旁見側出橫斜平直各相乘除得自然之數不差毫
末出新意於法度之中寄妙理於豪放之外所謂游刃
餘地運斤成風蓋古今一人而已余於他畫或不能必
其主名至於道子望而知其真偽也然世罕有真者如
史全叔所藏平生蓋一二見而已

書朱象先畫後

蘇子瞻

松陵人朱君象先能文而不求舉善畫而不求售文以
遺吾心畫以適吾意而已昔閭立本始以文學進身卒

蒙畫師之耻或者以是為君病余以謂不然謝安石欲使王子敬書太極殿榜以韋仲將事諷之子敬曰仲將魏之大臣理必不爾若然者有以知魏德之不長也使立本如子敬之高其誰敢以畫師使之阮千里善彈琴無貴賤長幼皆為彈神氣冲和不知何人所在內兄潘岳使彈終日達夜無忤色識者知其不可榮辱也使立本如千里之達其誰能以畫師辱之今朱君無求於世雖王公貴人其何道使之遇其解衣礪磻雖余亦得攬

攘其旁也

跋東坡竹石

朱元晦

東坡老人英秀後凋之操堅確不移之姿竹君石友庶
幾似之百世之下觀此畫者尚可想見也

跋唐人暮雨牧牛圖

朱元晦

予老於農圃日親犁耙故雖不識畫而知此畫之為真
牛也彼其前者却顧而徐行後者驤首而騰赴目光炯
然真若相語以雨而相趣以歸者覽者未必知也良工

獨苦其不信然延平余無競出示此卷卷中有劉忠定
鄒忠公題字覽之并足使人起敬而龍山老人又先君
所選士而余所嘗超走馬者也俛仰存歿為之慨然因
識其後而歸之

觀畫多忌

以下係
畫評

非好事不可妄傳書畫近火不可觀書畫向風日正唾
涕不洗手並不可觀書畫昔桓玄愛重圖畫每示賓客
有非好事者正食寒具

如今之油
煮環餅

以手捉書畫大點汚

玄惋惜移時自後每出法書輒令洗手

水衡記

鬼神易畫

顧愷之曰畫人最難次山水次狗馬若臺閣一定器耳
韓子曰狗馬難鬼神易狗馬乃凡俗所見鬼神則譎恠
之狀

名畫記

雪中芭蕉

書畫之妙當以神會難以形器求也世之觀畫者多能
指摘其間形象位置彩色瑕疵而已至於興理冥造者

罕見其人如彥遠畫評言王維畫物多不問四時如畫
花往往以桃杏芙蓉蓮花同畫一景予家所藏摩詰畫
袁安卧雪圖有雪中芭蕉此乃得心應手意到便成故
造理入神迴得天意此難以與俗論也

筆談

畫牛鴈法

有藏戴松鬪牛者以錦囊繫肘自隨出與客觀旁有牧
童曰鬪牛力在前尾入兩股間今畫鬪而尾掉何也黃
筌畫飛鴈頭足皆展人曰飛鳥縮頭則展足縮足則展

頭無兩展者驗之信然

仇池筆記

當辨時代

吳道子畫仲由戴木劍閭令公畫昭君着帷帽殊不知木劍創於晉代帷帽興於本朝舉此凡例亦畫之病也且如幅巾傳於漢魏簾離起自齊隋幘頭用於周朝巾子創於武德胡服靴衫豈可輒施於古象衣冠組綬不宜長用於今人芒屨非塞北所宜牛車非嶺南所有詳辨古今之物商較土風之宜指事會形可驗時代其或



生長南朝不見北朝人物習熟塞北不識江南山川鄭

玄未辨相梨蔡謨不識螳螂魏帝終刊典論

初謂無火浣布後刊

之隱居昧北藥名

本草多未曉北地藥名

吾之不知蓋闕如也精

通者宜詳辨南北之迹與古今之時然後可以議畫

衡水

墨竹之始

墨竹起於近代不知其所師承初吳道子作畫連筆作

卷不加丹青予意墨竹之師起於此

山谷墨竹序

輕色染成

國初江南布衣徐熙偽蜀翰林待詔黃筌以善畫著名尤長於畫花竹蜀平遂與江南布衣徐熙送圖畫院品其畫格諸黃畫花妙在賦色用筆極精細殆不見墨迹但以輕色染成謂之寫生徐熙以筆墨畫之殊草草畧施丹粉而已神氣迥出別有生動之意筌惡其軋已言其畫麤惡不入格罷之熙之子乃效諸黃之格更不用墨筆直以彩色圖之謂之沒骨圖工與諸黃不相下筌等不復能瑕疵遂得齒院品然其氣韻皆不及熙遠甚

筆談

正午牡丹

見牡丹門

張素敗牆

度支員外郎宋迪工畫尤善為平遠山水其得意者有
瀟湘八景往歲小窰村陳用之善畫迪見其畫山水謂
用之曰汝畫信工但少天趣且謂用之曰汝先當求一
敗牆張絹素訖倚之敗牆之上朝夕觀之既久隔素見
敗牆之上高平曲折皆成山水之象心存目想高者為

山下者為水坎者為谷缺者為澗顯者為近晦者為遠
神領意造恍然見其有人禽草木飛動往來之象了然
在目則隨意命筆默以神會自然景皆天就不類人為
是謂活筆用之自此畫格進筆談

馬不畫毛

畫牛虎皆畫毛惟馬不畫予嘗以問畫工工言馬毛細
不可畫予難之曰鼠毛更細何故却畫工不能對大凡
畫馬其大不過盈尺此乃以大為小所以毛細而不可

畫鼠乃如其大自當畫毛然牛虎亦是以大為小理亦不應見毛但牛虎深毛馬淺毛理須有別故名輩為小牛小虎雖畫毛但畧拂拭而已若務詳密醜成冗長約畧拂拭自有神觀迥然生動難可與俗人論也若畫馬如牛虎之大者理當畫毛蓋見小馬無毛遂亦不畫此庸人襲跡非可與論理也

筆談

律詩

畫鵲行

杜甫

高堂見生鶻颯爽動秋骨初驚無拘攣何得立突兀乃
知畫師妙巧刮造化窟寫此神俊姿充君眼中物烏鵲
滿樛枝軒然恐其出側腦看青霄寧為衆禽沒長翮如
刀劒人寰可超越乾坤空崢嶸粉墨且蕭瑟緬思雲沙
際自有煙霧質吾今意何傷顧步獨紆鬱

戲題王宰畫山水圖歌
杜甫

十日畫一水五日畫一石能事不受相促迫王宰始肯
留真跡壯哉崑崙方壺圖挂君高堂之素壁巴陵洞庭

日本東赤岸水與銀河通中有雲氣隨飛龍舟人漁子入
蒲淑山水盡亞洪濤風尤工速勢古莫比咫尺應須論
萬里焉得并州快剪刀剪取吳松半江水

奉先劉少府新畫山水障歌

杜甫

堂上不合生楓樹恠底江山起煙霧聞君埽却赤縣圖
乘興遣畫滄州趣畫師亦無數好手不可遇對此融心
神知君重毫素豈但祁岳與鄭虔筆迹遠過楊契丹得

非玄圃裂無乃雲濤翻悄然坐我天姥下耳邊已似聞
清猿反思前夜風雨急乃是蒲城鬼神入元氣淋漓陣
猶濕真宰上訴天應泣野亭春還雜花遠漁翁瞑踏孤
舟立滄浪水深青溟濶歌岸側島秋毫末不見湘妃鼓
瑟時至今斑竹臨江活劉侯天機清愛畫入骨髓自有
兩兒郎揮灑亦莫比大兒聰明到能添老樹巔崖裏小
兒心孔開貌得山僧及童子若耶溪雲門寺吾獨胡為
在泥滓青鞋布襪從此始

天育驃圖歌

杜甫

吾聞天子之馬走千里今之畫圖無乃是何意態雄
且傑駿尾蕭梢朔風起毛為綠驃兩耳黃眼有紫焰雙
瞳方矯然龍性含變化卓立天骨森開張伊昔太僕張
景順考牧攻駒閱清峻遂令大奴字天育別養驥子憐
神俊當年四十萬匹馬張公歎其才盡下故獨寫真傳
世人見之座右久更新年多物化空形影嗚呼健步無
由騁如今豈無騷裊與驪駟時無王良伯樂死即休

八駿圖

白居易

穆王八駿天馬駒後人愛之寫為圖背如龍兮頭如鳥
骨聳筋高脂肉少日行萬里速如飛穆王獨乘何所之
四荒八極踏欲遍三十二蹄無歇時屬車軸折趣不及
黃屋草生棄若遺瑤池西追王母讌七廟經年不親薦
壁臺南與盛姬遊明堂不復朝諸侯白雪黃竹歌聲動
一人荒樂萬人愁周從后稷至文武積德累功世勤苦
豈知纔及五代孫心輕王業如灰土由來尤物不在大

能蕩君心即為害文帝却之不肯乘千里馬去漢道興
穆王得之不為戒千里馬來周室壞至今此物尚稱珍
不知房星之精下為恠八駿圖君莫愛

杜秀才畫立走水牛歌

顧況

崑崙兒騎白象時時鑱着獅子項奚奴跨馬不搭鞍立
走水牛驚漢官江村小兒好誇騁腳踏牛頭上牛領淺
草平田捺過時大蟲着鈍幾落井杜生知我戀滄洲畫
作一障張床頭八十老婆拍手笑妒他織女嫁牽牛

畫竹歌贈協律郎蕭悅
白居易

植物之中竹難寫古今雖畫無似者蕭郎手下獨逼真
丹青已來唯一人人畫竹身肥擁腫蕭畫莖瘦節節疎
人畫竹梢死羸垂蕭畫枝活葉葉動不根而生從意生
不笋而成由筆成野懷水邊碕岸側森森兩叢十五莖
嬋娟不生筠粉態蕭颯盡得風烟情舉頭忽看不似畫
低耳靜聽疑有聲西叢七莖勁而健省向天竺寺前石
上見東叢八莖疎且寒憶曾湘妃廟裏雨中看幽姿遠

思少人別與君相顧空長歎蕭郎老可惜手戰眼昏頭
雪色自信便是絕筆時從今此竹尤難得

韓幹馬十四匹

蘇子瞻

二馬並驅攢八蹄二馬宛頸駿尾齊一馬在前雙舉後
一馬却避長鳴嘶老髯奚官騎且顧前身作馬通馬語
後有八匹飲且行微流赴吻若有聲前者既濟出林鶴
後者欲涉鶴俛啄最後一匹馬中龍不嘶不動尾搖風
韓生畫馬真是馬蘇子作詩如見畫世無伯樂亦無韓

此詩此畫當誰看

孫彥古畫風雨山水歌

張文潛

山深巖高石壁青白日忽變天晦冥黑風驅雲走不停
驚電疾雨來如傾山前雨點大如手山下水湧危樵橫
崩崖古樹老有靈吼怒直與風雲爭枝披葉偃闔不怯
萬竅却欲藏雷霆鞭驅疾驅者誰子石路嶮澁驢凌兢
目迷心懾愈走愈不及來憇樹下如寒蠅蒼茫直與鬼
神接恍惚不保龍蛇驚平居此樂忽入眼孫家古圖纔

可辨柰何一幅一尺餘欲奪天地之奇變我心愛之良
有以昔苦山行親遇此一生兩足不下堂輸爾朱門貴
公子

觀易元吉獐猿圖歌

秦少游

參天古木相繆枝嵌空恠石御青漪兩猿上下一旁掛
兩猿熟視蒼蛙疑蕭蕭叢竹山風吹海棠杜宇相因依
下有兩獐從兩兒花殮草嚙含春嬉藝老筆精湖海盡
推意忘形形更奇解衣一掃神扶持他日自見猶嗟咨

金錢百萬酒千鷗
荆南將軍欣得之
老禪豪取索為垂
白晝掩門初許窺
房櫳炯炯明冬曦
榛藂羽草分毫墮
殘編未終且歸讀
歲暮有閒重借披

猴馬

并引

陳無已

楚州紫極宮有畫沐猴振索以戲馬頓索
以驚圉人不測從後鞭之人言沐猴宜馬
而今為累作詩以道其意

沐猴自戲馬自驚
圉人未解猴馬情
猴其天資馬何罪

意欲防患猶傷生異類相宜亦相失同類相傷非所及
志行萬里因一誤吐豆豔荻甘伏檻

和張規臣水墨梅五絕 陳去非

刺畫無鹽醜不除此花風韻更清殊從教變白能為黑
桃李依然是僕奴

又

病眼昏花已數年只應梅蘂故依然誰教也作陳玄面
眼亂初逢未敢憐

又

粲粲江南萬玉妃
別來幾度見春歸
相逢京洛渾依舊
唯恨緇塵染素衣

又

含章簷下春風面
造化功成秋兔毫
意足不求顏色似
前身相馬九方臯

又

自讀西湖處士詩
年年臨水看幽姿
晴窗盡出橫斜影

絕勝前村夜雪時

詩話

圖塞上詩

馮太傅端嘗書云鳴骹直上一千尺天靜無風聲更乾
碧眼胡兒三百騎盡提金勒向雲看謂坐客曰可圖於
屏障乃柳如京塞上詩也

倦游錄

見詩如畫

歐陽公題畫圖詩云古畫畫意不畫形梅詩詠物無隱

情忘形得意知者寡不若見詩如識畫此真為識畫也

筆談

古今事文類聚前集卷四十

欽定四庫全書

古今事文類聚前集卷四十一

宋 祝穆 撰

技藝部

傳神

羣書要語君子之容舒遲足容重手容恭目容端口容
止聲容靜頭容直氣容肅立容德色容莊玉形本於精
神精神生於道莊北道與之貌天與之形德充君子有

三變望之儼然即之也溫聽其言也厲

子張

仁義禮智根

於心其生色也晬然見於面盎於背

盡心

詩句可憐俱是畫誰能辨寫真

梁簡文帝詠美人看畫

古今事實

審象

高宗夢得說乃審厥象俾旁求於天下說築傳巖之野

惟肖

圖像麒麟閣

宣帝甘露三年單于始入朝上思股肱之美廼圖畫其人於麒麟閣法其形貌署其官爵姓名唯霍光不名曰大司馬大將軍博陸侯其末曰典屬國蘇武

圖像雲臺

顯宗追感前世功臣乃圖畫二十八將於南宮雲臺始於鄧禹終於耿紀其外又有王常李通竇融卓茂合三十二人故依其本第係之篇末以志功名之次惟馬援以椒房故獨不及

圖像凌煙閣

太宗貞觀十七年凌煙閣圖畫勲臣河間元王孝恭房
梁公玄齡杜葉公如晦魏鄭公徵李衛公靖李英公勳
虞永興公世南尉遲鄂公敬德段褒公志玄合二十二
人魏徵亡帝思不已登凌煙閣觀畫象賦詩悼痛聞
者媚之帝不悅乃傳昏仆碑薛收卒太宗親自臨問
哀慟左右後凌煙圖像嘆曰薛收遂成故人恨不早圖
其像

畫王昭君

見妃嬪門

長康傳神

晉顧愷之字長康尤善丹青圖寫特妙謝安深重之以為自蒼生以來未之有也愷之每畫人成或數年不點目睛曰四體妍蚩本無闕少於妙處傳神寫照正在阿堵中每重秘康四言詩因為之圖常云手揮五絃目送歸鴻難嘗圖裴楷象頰上加三毛觀者覺神明殊勝又為謝鯤象在石巖裏云此子宜置丘壑中欲圖殷仲

堪有目疾固辭愷之曰明府正為眼耳若明點瞳子飛白拂上使如輕雲之蔽月豈不美乎仲堪從之

華屋圖賢

晉嵇含為郎中時弘農王粹以貴公子尚主館宇甚盛圖莊周垂綸之象命含為贊含援筆為文云畫真人於剡楸之室載退士於進趣之堂可謂託非其所可弔而不可贊也

得其神氣

周昉窮丹青之妙郭令公子壻趙縱侍郎嘗令韓幹寫
真又請昉寫未能定其優劣趙國夫人歸省令公問此
畫何人對曰趙郎又云何者最似答云兩畫摠似前畫
空得趙郎形貌後者兼得其神氣情性

朱桃椎像

成都畫師姓許善傳神一日有人敝衣憔悴求傳神許
笑之其人解布囊出黃道服鹿皮冠白玉簪頂冠易衣
危坐以手摩面則童顏矣引其鬚應手而黑乃一美丈

夫也許驚曰不知神仙臨降道人曰君傳吾神置肆中
有求售止取千錢後有識者云此唐神仙傳朱挑椎也
求者輻輳許貪畫直每像輒取二千夢道人曰汝福有
限安得過取掌其左頰既寤頭遂偏

括異錄

誤認畫像

世人畫韓退之小面美髯乃江南韓熙載耳熙載謚文
靖亦謂之韓文公因此謬為退之退之肥而寡髯後世
不復辨也

筆談

戲責畫工

完太尉進畫真大怒詰畫師云我前時見畫大蟲猶用
金薄點眼我豈不消得一對金眼睛

曾類說

一髭不似

程伊川云今人以影祭或一髭髮不相似則所祭已是
別人大不便

形韻之別

陳后山云歐陽公像公家與蘇眉山皆有之而各自是

也蓋蘇本韻勝而失形家本形似而失韻形而不韻乃
所謂畫非傳神

訟毀畫像

見官政門

垂崖留像

畫溫公像

並見喪事門

古今文集

雜著

傳神記

蘇子瞻

傳神之難在目顧虎頭云傳神寫影都在阿堵中其次在顴頰吾嘗於燈下顧自見頰影使人就壁摸之不作眉目見者皆失笑知其為吾也目與顴頰似餘無不似者眉與鼻口可以增減取似也傳神與相一道欲得其人之天法當於衆中陰察之今乃使人具衣冠坐注視一物彼方斂容自持豈復見其天乎凡人意思各有所在或在眉目或在鼻口虎頭云頰上加三毛覺精采殊勝則此人意思蓋在顴頰間也優孟學孫叔敖抵掌談

笑至使人謂死者復生此豈舉體皆似亦得其意思所
在而已使畫者悟此理則人人可以為顧陸吾嘗見僧
惟真畫曾魯公初不甚似一日往見公歸而喜甚曰吾
得之矣乃於眉後加三紋隱約可見作俛首仰視眉揚
而額蹙者遂大似南都程懷立衆稱其能於傳吾神大
得其全懷立舉止如諸生蕭然有意於筆墨之外者也
故以吾所聞助發云東坡居士書

贈寫真劉琮序

胡邦衡

畫莫難於寫真非寫形似之難寫心之精微為難也蓋君子小人貌或類而心不同寫其形似而不得其心之精微或以小人為君子未見其能寫也今夫世俗所謂骨肉之至貴者宜莫如秀眉重瞳龍顏鳳姿日角也然堯秀眉魯僖馬卿亦秀眉舜重瞳子項羽朱友敬亦重瞳子漢高龍顏嵇叔夜亦龍顏世祖日角唐高祖亦日角文皇鳳姿李相國亦鳳姿然則魯僖沐猴可以比堯舜而嵇李可以擬漢祖唐宗乎世俗所謂骨相之至惡

者宜莫如虎狼蒙魑鳬肩之相也然尼父面如蒙魑陽
虎亦如蒙魑竇將軍鳬肩馬賓王亦鳬肩揚食我熊虎
之狀班定遠亦燕頤虎頭司馬懿狼顧而周嵩狼抗然
則虎可以比尼父而憲之不臣可以比賓王之忠食我
之惡可以擬定遠之勲乎故曰君子小人貌或似而心
不同寫其形似而不得其心之精微或以小人為君子
未見其能寫也鄉老劉琮慶先天機精到得金粟影筆
法恨世無褒鄂之毛骨以發其奇逢佳士或尋常人質

鬼貌藍斂頤折頰時一弄翰曲盡形似之妙雖君子小人骨相或同間不容髮而其心判然自殊如涇渭之不相亂老杜所謂乃知畫師妙工刮造化窟者其在斯人歟雖然何獨畫哉自古以其形似而不研其心至以優旃為孫叔敖以虎賁為蔡中郎以成方遂為戾太子以蕭至忠為源乾曜以揚國忠為裴寬者多矣其禍可勝言哉予於劉生竊有所感故敘以識別

送寫真郭拱辰序

朱元晦

世之傳神寫照者能稍得其形似已得稱為良工今郭
岩拱辰叔瞻乃能并與其精神意趣而盡得之斯亦奇
矣予頃見友人林澤之游誠之稱其為人而招之不至
今歲忠然來自昭武里中士夫數人欲觀其能或一寫
而肖或稍稍損益卒無不似而風神氣韻妙得其天致
有可笑者為予作大小二象宛然麋鹿之姿林野之性
持以示人計雖相聞而不相識者亦有以知其為予也
然予方將東遊鴈蕩窺龍湫登玉霄以望蓬萊而歷麻

源經玉筍據祝融之絕頂以臨洞庭風濤之壯北出九江上廬阜入虎溪訪陶翁之遺迹然後歸而思自休焉彼當有隱君子者世人所不得見而予幸將見之欲圖其形似歸而郭君以歲晚思親不能久從予遊矣予於是亦有遺恨焉因其告行書以為贈

贈寫真葉君序

游誠之

頃有寫真者謁余求數語謂欲藉手諸公間且戒曰當借高論毋卑我余戲應之曰天下百工商旅皆可夸也

余嘗旦而入市徧閱標榜無一謙詞者茗飲耐沽率自矜其美好龜契瓦擊率自眩其神奇至于往來貿易伎藝瑣碎類皆即事自名以致來者獨寫真不然懸之通衢人見之以為肖似則是技之良精人不以為似是拙工矣君雖欲自譽不可而余何以譽君又如一世之士視百工商旅高矣然亦不免稍自推揚之以濟其售言詩視李白言文視韓退之言律已視伯夷曾參言兵識孫吳言治齊卓魯言理財抗績管蕭桑劉而當世用之

亦安能盡名其然不然者惟寫真又異乎是其精粗美惡有標的具在無所自適子持其技即往路人而卜焉此余序意也寫真者不憚而去余是說留胸中久之江西葉君自言本書生已而棄故業為此又求序於余余以此說示之曰君知書者得毋再不憚乎葉君曰然余之技所與交者上而薦紳大夫下而百工商賈皆有之得君之說非惟可以自警有求余技者亦因以警之余矍然不知其意將出此也業已戲言因書以為贈

東方朔畫像贊

夏侯孝若

大夫諱朔字曼倩琅瑋博達思周變通以為濁世不可以富貴也故薄游以取位苟出不可以直道也故頡頏以傲世傲世不可以垂訓也故正諫以明節明節不可以久安也故詼諧以取容潔其道而穢其迹清其質而濁其文弛張而不為邪進退而不離羣若乃遠心曠度瞻志宏材侔儻博物觸類多能合變以明筭幽贊以知來自三墳五典八索九丘陰陽圖緯之學百家眾流之

論周給敏捷之辯支離覆逆之數經脉藥石之藝射御
書數之術乃研精而究其理不習而盡其功經目而諷
於口過耳而識於心夫其明濟開豁包含宏大陵轢卿
相嘲哂豪傑籠罩靡前跼藉貴勢出不休顯賤不憂戚
戲萬乘如寮友視儔列如草芥雄節邁倫高氣蓋世可
謂拔乎其萃游方之外者也談者又以先生呼吸冲和
吐故納新蟬蛻龍變棄俗登仙神交造化靈為星辰此
又奇恠恍惚不可備論者也大人來守此國僕自京都

言歸定省覩先生之縣邑想先生之高風徘徊路寢見
先生之遺像逍遙城郭觀先生之祠宇慨然有懷乃作
頌焉

矯矯先生肥遯居貞退不終否進不避榮臨世濯足希
古振纓涅而無滓既濁能清無滓伊何高明克柔能清
伊何視汙若浮在樂必行處淪罔憂跨世陵時遠蹈獨
游瞻望往代爰想遐蹤邈邈先生其道猶龍染跡朝隱
和而不同栖遯下位聊以從容我來茲邑遺像在圖周

旋祠宇庭序甚蕪穰棟傾落草萊弗除肅肅先生豈焉
是居是居弗形悠悠我情昔在有德罔不遺靈天秩有
禮神監孔明髣髴風塵用垂頌聲

諸葛武侯畫像贊

張敬夫

惟忠武侯識其大者仗義履正卓然不捨方卧南陽若
將終身三顧而起時哉屈伸難平者事不昧者機大綱
既得萬目乃隨我奉天討不震不竦惟一其心而以時
動噫侯此心萬世不泯遺像有嚴瞻者起敬

乾道丁亥予遊長沙見張敬夫書室有武侯畫像
甚古云是劉丈子駒家藏唐閻立本筆因謂敬夫
盍為之贊敬夫欣然口占立就語簡意到聞者歎
服以為非深知武侯心事者不能道也王兄齊賢
因摹本而屬敬夫手題其上後二十九年齊賢諸
子出以視予俯仰疇昔如昨日事而三君子皆不
可見矣為之太息記其下方

朱文公跋

自題寫真贊

裴度

爾才不長爾貌不揚同胡為將胡為相一片靈臺丹青
莫狀

東坡畫像贊

黃魯直

子瞻堂堂出于峨眉司馬班揚金馬石渠閔士如墙上
前論事釋之馮唐言語以為階而投諸雲夢之黃東坡
之酒赤壁之笛嬉笑怒罵皆成文章解羈而歸紫微玉
堂子瞻之德未變於初爾而名之曰元祐之黨貶之朱
崖僭耳方其金馬石渠不自知其東坡赤壁也及其東

坡赤壁不自意其紫微玉堂也及其紫微玉堂不自知其朱崖僂耳也九州四海知有東坡東坡歸矣民笑且歌一日不朝其間容戈其一丘一壑則無如此道人何

又贊

黃魯直

岌岌堂堂如山如河其愛之也引之上西掖鑿坡是亦一東坡非亦一東坡槁項黃馘觸時干戈其惡之也投之於鯢鯨之波是亦一東坡非亦一東坡計東坡之在天下如太倉之一稊米至於臨大節而不可奪則與天

地相終始

六先生畫像贊

朱元晦

濂溪先生

道喪千載聖遠言湮不有先覺孰開我先書不盡言圖
不盡意風月無邊庭草交翠

明道先生

揚休山立玉色金聲元氣之會渾然天成瑞日祥雲和
風甘雨龍德正中厥施斯普

伊川先生

規圓矩方繩直準平允矣君子展也大成布帛之文菽

粟之味知德者希孰識其貴

語錄云伊川之言
久看方好故云

康節先生

天挺人豪英邁蓋世駕風鞭霆歷覽無際手探月窟足
躡天根間中今古靜裏乾坤

橫渠先生

早悅孫吳晚逃佛老勇撤臯毗一變至道精思力踐妙

契疾書訂頑之訓示我廣居

涑水先生

篤學力行清修苦節有德有言有功有烈深衣大帶張
拱徐趨遺像凜然可肅薄夫

南城吳仲兄弟寫真求贊 周子充

方丈蓬瀛早陪羣英鳳掖鰲局中數帝文晚侍嚴宸偏
持樞釣若非精神滿腹則當容貌動人何斂頤而折頰
弗走俗而抗塵豈所謂相形不如論心見面不如聞名

者耶

亡友張敬夫畫像贊

朱元晦

擴仁義之端至於可以彌六合謹善利之判至於可以
析秋毫拳拳乎其致主之切汲汲乎其幹父之勞仡仡
乎其任道之勇卓卓乎其立心之高知之者識其春風
沂水之樂不知者以為湖海一世之豪彼其揚休山立
之姿既與其不可傳者死矣觀於此者尚有以卜其見
伊呂而失蕭曹也耶

朱晦庵畫像贊

陳同父

體備陽剛之純氣含喜怒之正睟面盎背吾不知其何
樂端居深念吾不知其何病置之釣臺擦不住寫之雲
臺捉不定天下之生久矣以聽上帝之命

呂伯恭畫象贊

朱元晦

括蒼潘君叔度畫其先師東萊呂氏伯恭父之象於可
庵退老堂之上曰毋使西河之民疑我於夫子也屬其
友朱熹贊之為作詞曰

以一身而備四時之和以一心而涵千古之祕推其有
足以尊主而庇民出其餘足以範俗而垂世然而狀貌
不逾於中人衣冠不詭於流俗迎之而不見其來隨之
而莫覩其躅矧是丹青孰形心曲惟嘗見之者於此而
復見之焉則不但遺編之可續而已也

吾友王才臣命秀才劉訥寫余真戲自贊

楊廷秀

汝翎弗長汝趾弗強毋駛汝頑毋競汝驤于崖于濱其

窈其茫曠曠其光弋誰汝傷秋作月荒春作華荒哦者
遜匹醕者遜狂汝老是鄉莫與汝爭銳

吉州通守趙德輝命史寫老醜戲題之曰

楊廷秀

有綌者巾有藜者杖雲嶠風杉步月獨往龍伯國之民
歟無功鄉之民歟

張功父命水鑑寫誠齋求贊

楊廷秀

索汝乎北山之北汝在南山之南索汝乎南山之南汝
在北山之北丁寧溪風約束杉月有問汝者千萬勿說
誰遣汝多言而滑稽又遭約齋之牽率

吳汝玉命劉敏叔寫老醜真諸兩先生之後
因題其上

楊廷秀

益國晦翁前瞻後視珠玉在側覺我形穢

辛稼軒畫像贊

陳同父

眼光有稜足以照映一世之豪背脾有負足以荷載四

國之重出其豪末翻然震動不知鬚鬢之既斑底幾膽
力之無恐呼而來麾而去無所逃天地之間撓弗濁澄
弗清豈自為將相之種故曰真鼠枉用真虎可以不用
而用也者所以為天寵也

古詩

丹青引

贈曹將軍霸

杜甫

將軍魏武之子孫於今為庶為青門英雄割據雖已矣
文彩風流今尚存學書初學衛夫人但恨無過王右軍

丹青不知老將至富貴於我如浮雲開元之中嘗引見
承恩數上南薰殿凌煙功臣少顏色將軍筆下開生面
良相頭上進賢冠猛將腰間大羽箭褒公鄂公毛髮動
英姿颯爽來酣戰先帝天馬五花驄畫工如山貌不同
是日牽來赤墀下迴立閭闔生長風詎謂將軍拂絹素
意象慘澹經營中斯須九重真龍出一洗萬古凡馬空
玉花却在御榻上榻上庭前屹相向至尊含笑催賜金
圉人太僕皆惆悵弟子韓幹早入室亦能畫馬窮殊相

幹惟畫肉不畫骨忍使驂騑氣凋喪將軍盡善蓋有神
必逢佳士亦寫真即今漂泊干戈際屢貌尋常行路人
途窮反遭俗眼白世上未有如公貧但看古來盛名下
終日坎壈纏其身

贈寫御容妙善師

蘇子瞻

憶昔射策干先皇珠簾翠幄分兩廂紫衣中使下傳詔
跪捧作拜聞天香仰觀眩晃目生暈但見曉色開扶桑
迎陽晚出步就坐絳紗玉斧光照廊野人不識日月角

卷四十一
髻髻尚記重瞳光三年來歸真一夢橋山松檜淒風霜
天容玉色誰敢畫老師古寺畫間房夢中神授心有得
覺來信手筆已忘幅巾常服儼不動孤臣入門涕自滂
元老侑坐鬚眉古虎臣立侍冠劍長平生慣寫龍鳳姿
肯顧草間猿與獐都人踏破鐵門限黃金白壁空堆牀
爾來摹寫亦到我謂是先帝白髮郎不須覽鏡坐自了
明年乞身歸故鄉

贈寫真何充秀才

蘇子瞻

君不見潞州別駕眼如電左手挂弓橫撚箭又不見雪中騎驢孟浩然皺眉吟詩肩聳山饑寒富貴兩安在空有遺像留人間此身常擬同外物浮雲變化無蹤跡問君何苦寫我真君言好之聊自適黃冠野服山家客意欲置我山巖中勲名將相今何限往寫褒公與鄂公

贈李道士

井序

蘇子瞻

駕部員外郎李君宗同景祐中良吏也守漢州有道士尹可元精鍊善畫以遺火得

罪當死君緩其獄會赦獲免時可元八十
一自誓且死必為李氏子以報可元既死
二十餘年而君子世昌之婦夢可元入其
室生子曰得柔小名蜀孫幼而善畫既長
讀莊老喜之遂為道士賜號妙應事母孝
謹聞其寫真蓋妙絕一時云

世人只數曹將軍誰知虎頭非癡人腰間大羽何足道
頰上三毛自有神平生狎侮諸公子戲着幼輿巖石裏

故教世世作黃冠布襪青鞋弄雲水千年鼻祖尸守闕

門一念還為李耳孫

闕令尹喜令老子著書

香火舊緣何日盡丹

青餘習至今存五十之年初過二衰年記我今如此他
時要指集賢人知是香山老居士

贈寫真李道士

蘇子由

君不見景靈六殿圖功臣進賢大羽東西陳能令將相
長在世自古獨有曹將軍嵩高李師掉頭笑自言弄筆
曹前身百年遺像誰復識滿朝冠劍多偉人據鞍一見

心有得臨牕相對疑通神十年江海鬚半脫歸來俛仰
慙簪紳一揮七尺倚牆立客來顧我誠似君金章紫綬
本非有綠蓑黃犢甘長貧何如畫作白衣老置之茅屋
全吾真

贈都下寫真葉德明

楊廷秀

我昔山林人不識或疑謫仙或狂客仰看青天不看人
醉裏那知眼青白一槌破硯入長安素衣成緇綠鬢班
上林麒麟看野馬滄洲鷗鷺綴孔鸞漢官威儀既不入

貴人樣灞橋風雪又不見詩人相不須覽鏡照清溪我
亦自憎塵俗狀葉君着眼秋月明葉君下筆秋風生市
人請畫即唾罵只寫龍章鳳姿公與卿肯來為予寫衰
貌擲筆掉頭欣入妙相逢可惜遲十年不見詩翁昔年
少

贈寫真水鑑處士王溫叔 楊廷秀

我不如森森千丈松我不如濯濯春月柳髯疎鬢禿已
雪霜皮皺肉皺真老醜葉生盡時顏尚朱王生盡時骨

更曜一生愛山吟不就兩肩化作秋山瘦君不見褒公
鄂公圖凌煙腰間羽箭大如椽君不見浣花醉圖粉墨
落日斜泥滑驢失脚貴人寒士兩相嗤畫圖猶在人已
非王生王生且停手不如生前一杯酒

書丹元子所示李太白真 蘇子瞻

夫人幾何同一漚謫仙非謫乃其遊麾斥八極隘九州
化為兩鳥鳴相酬一鳴一止三千秋開元有道為少留
縻之不可矧肯求

又

西望太白橫峨岷眼高四海空無人大兒汾陽中令君
小兒天台坐忘真平生不識高將軍手污吾足乃敢嗔
作詩一笑君應聞

杜甫畫像

王介甫

吾觀少陵詩謂與元氣侔力能挑天幹九地壯顏毅色
不可求浩蕩八極中生物豈不稠醜妍巨細千萬殊竟
莫見以何雕鏤惜哉命之窮顛倒不見收青衫老更斥

餓走半九州瘦妻僵前子仆後攘攘盜賊森戈矛吟哦
當此時不廢朝廷憂嘗願天子聖大臣各伊周寧令吾
廬獨破受凍死不忍四海赤子寒飈飈傷屯悼屈止一
身嗟時之人我所羞所以見公像再拜涕泗流推公之
心古亦少願起公死從公游

杜子美浣花醉圖

黃魯直

拾遺流落錦官城故人作尹眼為青碧雞坊西結茅屋
百花潭水濯冠纓故衣未補新衣綻空蟠胸中書萬卷

探道欲度羲黃前論詩未覺國風遠干戈崢嶸暗寓縣
杜陵韋曲無雞犬老妻稚子且眼前弟妹漂零不相見
此公樂易真可人園翁溪友肯卜鄰鄰家有酒邀皆去
得意魚鳥來相親沅花酒船散車騎野塙無主看桃李
宗文守家宗武扶落日蹇驢馱醉起願聞解冠脫玃鑿
老儒不用千戶侯中原未得平安報醉裏眉攢萬國愁
生綃鋪墻粉墨落平生忠義今寂寞兒呼不蘇驢失脚
猶恐醒來有新作常使詩人拜畫圖煎膠續弦千古無

律詩

贈寫御真李長史

李遠

玉座煙銷硯水清，龍髯不動彩毫輕。
乍分隆準山河秀，初點重瞳日月明。
宮女卷簾皆暗認，侍臣開殿盡遙驚。
六朝天下應無敵，始覺僧繇浪得名。

南城吳氏社倉書樓為余寫真因題其上

朱元晦

蒼顏已是十年前，把鏡回看一悵然。
履薄臨深諒無幾，

且將餘日付殘篇

詩話

詩可傳神

李太白風神超邁英爽可知後世詞人狀者多矣亦間見於丹青俱不若少陵所作落月滿屋梁猶疑照顏色之句熟味之百世之下想見其風采此詩與太白傳神也陳後山和饒節詠周昉畫李太白真云醉色盡玉色起分明尚帶金井水烏紗白苧真大人不用更着山巖

裏

金粟影

老杜詩虎頭金粟影神妙獨難忘佛經有金粟如來謂顧愷之所畫維摩也

樂天寫真


白樂天為翰林學士奉詔寫真集賢院後為九老會又寫真香山寺故賦詩云昔作少學士圖形入集賢今為老居士寫貌寄香山

畫洞賓像

滕宗諒守巴陵有華州回道士上謁風骨聳秀滕知其
異人口占詩贈之曰華州回道士來到岳陽城別我游
何處秋風一劍橫回聞之憮然大笑而別或云宗諒因
密令畫工圖其形今岳陽樓傳本狀貌清俊與俗本特

異

筆
談



古今事類聚前集卷四十一

欽定四庫全書

子部

古今事文類聚前集卷四十二

詳校官中書臣康綸鈞

侍讀臣孫球覆勘

總校官編修臣王燕緒

校對官中書臣陸湘

謄錄監生臣范墉

欽定四庫全書

古今事文類聚前集卷四十二

宋 祝穆 撰

伎藝部

射

羣書要語侯以明之書益君子無所爭必也射乎揖讓

而升下而飲其爭也君子伯內志正外體直然後持弓

矢審固然後可以言中義可以觀德行矣射射者仁之道

也射求正諸已已正而后發發而不中則不怨勝已者
反求諸已而已矣上同射不主皮為力不同科古之道也

八伊尹乃言曰若虞機張往省括于度則釋太甲

古今事實

羿射九鳥

堯時十日竝出命羿仰射十日中其九鳥皆死墮其翼

穀淮南子

逢蒙射羿

逢蒙學射於羿盡羿之道思天下惟羿為愈已於是殺
羿孟子曰是亦羿有罪焉

甘蠅貫蝨

甘蠅古之善射者彎弓而獸伏鳥下弟子飛衛學射於
甘蠅巧過其師紀昌又學射於飛衛衛曰視小如大視
微如著而後告我昌以瓮垂蝨於牖間南面而望之旬
月之間浸大也三年之後如車輪焉乃以燕角之弛朔
蓬之幹射之貫蝨之心而垂不絕昌既盡衛之術計天

下之敵已者一人而已乃謀殺衛一日相遇於野二人
交射中路矢鋒相觸墜於地而塵不揚衛之矢先窮昌
遺一矢既發衛以荆棘之端打之而無差於是二人相
拜於塗請為父子

列湯問

孔子觀射

孔子射于矍相之圃蓋觀者如堵墻使子路執弓矢
出延射曰賁軍之將亡國之大夫與為人後者不入其
餘皆入益去者半入者半又使公罔之裘揚觶而語曰

幼壯孝弟耆耄好禮不從流俗脩身以俟死

絕句

者不

在此位也蓋去者半處者半序點又揚觶而語曰好學不倦好禮不變旄期稱道不亂

絕句

者不

句

在此位也蓋

勵有存者

射義

由基穿楊

養由基蹲甲而射之徹七札焉

左成十六

楚有養由基者善

射去柳葉百步而射之百發而百中左右觀者數千人皆曰善射有一夫立其旁曰善可教射矣養由基怒曰

客安能教我射乎客曰非吾能教子支左詘右也夫去
柳葉百步而善之不以善息少氣衰力倦弓撥矢鉤一
發不中者百發盡息

史周紀

彈人觀避

晉靈公不君從臺上彈人而觀其避丸

宣公三年

猿能搏矢

楚王有猿自射猿搏矢而喜使養由基射始調弓猿擁
木而啼

射虎乃石

楚熊渠子夜行見寢石以為伏虎彎弓射之沒金飲羽
下視知其石也因復射石矢摧無跡渠子見其誠心金
石為之開而況於人乎

韓詩外傳

李廣為右北平太守出獵

見草中石以為虎而射之中沒鏃視之石因復射之終
不復入廣所居郡間有虎自射之及居右北平射虎虎
騰傷廣廣亦竟射殺之廣為人長援臂其善射亦天性
也史李逵出獵見叢薄中以為伏兔射之旋入寸餘細

視之乃石周文曰可謂世載其德矣

北史

力可扼虎

李陵有廣之風力扼虎射命中注命中者所指名處即中之

激矢殺子

後漢宋則為鄢陵令則子年十歲與蒼頭共弩射弦斷矢激誤中子即死奴抱頭就誅則察而恕之潁川荀爽深以為美

善射不知

晉魏舒性好騎射為後將軍鍾毓長史毓每與叅佐射
舒常為畫籌而已後遇朋人不足以舒滿數毓初不知
其善射舒容範閒雅發無不中毓嘆謝曰吾之不足知
卿如此射矣豈一事哉

射飛必中

琅瑯郡公賀拔勝字破胡尤工武藝走馬射飛十中其
五六

康肅善射

陳康肅公堯咨善射當世無雙公亦以此自矜嘗射於家圃有賣油翁釋擔而睨之久而不去見其發矢十中八九但微頷之康肅問曰汝亦知射乎吾射不亦精乎翁曰無他但手熟耳康肅忿然曰爾安敢輕吾射翁曰以我酌油知之乃取一葫蘆置於地以錢覆其口徐以杓酌油澀澀自錢孔入而錢不濕因曰我亦無他唯手熟耳康肅笑而遣之

金坡遺事

古今文集

詩話

作詩嘲射

唐宋國公蕭瑀不能射太宗賜射俱不着堞歐陽詢作
詩嘲曰急風吹緩箭弱手馭強弓欲高番覆下應西還
更東十迴俱着地两手併擎空借問誰為此多應是宋
公後帝見此詩謂蕭瑀曰此乃四十字章疏也由是與

詢有隙

啟顏錄

投壺

羣書要語投壺之禮主人奉矢司射奉中使人執壺主人請曰某有枉矢哨壺請以樂賓賓曰子有旨酒嘉有某既賜矣又重以樂敢辭主人曰枉矢哨壺不足辭也敢固以請賓曰敢不敬從

投壺

古今事實

投壺而中

晉侯以齊侯宴中行穆子相投壺晉侯先穆子曰有酒

如淮有肉如坻寡君中此為諸侯師中之齊侯舉矢曰
有酒如澠有肉如陵寡人中此與君代興亦中之伯瑕
謂穆子曰子失辭吾固師諸侯矣壺何為焉以其中雋
也齊君弱吾君歸弗來矣

左傳

激矢還反

武帝時郭舍人善投壺以竹為矢能激矢還一矢百反

謂之驍

西京雜記

雅歌投壺

祭遵為將軍取士皆儒術對酒設樂必雅歌投壺雖在
軍旅不忘俎豆之事可謂好禮悅樂

末箭中耳

邵康節赴河南尹李君錫會投壺君錫末箭中耳君錫
曰偶爾中耳康節應聲曰幾乎敗壺坐客以為的對聞見
錄

古今文集

雜著

論驍箭巧中

顏之推

投壺之禮近世愈精古者實以小豆為其天之躍也今則唯欲其驍益多益喜乃有倚竿帶劍狼壺豹尾龍首之名其尤妙者有蓮花驍汝南周璜弘正之子會稽賀徽賀草之子竝能一箭四十餘驍賀又嘗為小障置壺其外隔障投之無所失也至鄴以來亦見廣寧蘭陵諸王有此校具舉國遂無投得一驍者彈棊亦近世雅戲消愁釋憤時可為之

顏氏家訓

投壺格并序

司馬君實



傳曰張而不弛文武弗能也弛而不張文武弗為也一
張一弛文武之道也君子學道從政勤勞罷倦必從容
宴息以養志游神故可久也蕩而無度將以自敗故聖
人制禮以為之節因以合朋交之和飾賓主之歡且寓
其教焉夫投壺細事遊戲之類而聖人取之以為禮用
諸鄉黨用諸邦國其故何哉鄭康成曰投壺射之細也
古者君子射以觀德為其心平體正端壹審固然後能
中故也蓋投壺亦猶是矣夫審度於此而取中於彼仁

道存焉疑畏則疎惰慢則失義方象焉左右前卻過分則差中庸著焉得一失二成功盡棄誠慎明焉是故投壺可以治心可以脩身可以為國可以觀人何以言之夫投壺者不使之過亦不使之不及所以為中也不使之偏頗流散所以為正也中正道之根柢也聖人作禮樂脩刑政主教化垂典謨凡所施為不啻萬端要在納民心於中正而已然難得而制者人之心也自非大賢守道敦篤將放蕩傾移無所不至求諸少選且不可得

故聖人廣為之術以救之投壺與其一焉觀夫臨壺荷矢之際性無粗密莫不聳然恭謹志存中正雖不能久可以習焉豈非治心之道歟一矢之失猶一行之虧也豈非脩身之道歟兢兢業業慎終如始豈非為國之道歟君子之為之也確然不動其心儼然不改其容未得之而不懾既得之而不驕小人之為之也俯身伸臂挾巧取竒苟得而無媿豈非觀人之道歟由是言之聖人取以為禮宜矣彼博奕者以詭譎相高以殘賊相勝孔

子猶曰飽食終日無所用心為之猶賢乎已況投壺者
又可鄙略而輕廢哉古者壺矢之制揖讓之容今雖闕
焉然其遺風餘烈猶可髣髴也世傳投壺格圖皆以奇
雋難得者為右是亦投瓊探闔之類爾非古禮之本意
也余今更定新格增損舊圖以精密者為右中中者為
下使夫用機僥倖者無所措手焉壺口徑三寸耳徑一
寸高一尺實以小豆去席二箭半箭十有二長二尺有
四寸以全壺不失者為賢苟不能全則積算先滿百二

十者勝後者負俱滿則餘算多者勝少者負為圖列之
左方并各釋其指意焉




有初首箭中也君子作事
謀始以其能慎始故賞之

右筭十


連中第二箭以下連中不
絕者

右筭五




有初貫耳假若有初箭仍
貫耳其算別計

右二十算




貫耳耳小於口而能中之
是其用心愈精故賞之

右十算




右一筭

為敗箭
敗箭若一箭不中次箭皆




連中貫耳
舊圖初箭二筭其次每箭加二
筭盡四箭而止甚非勸功
之道今自二箭以下連中
不絕者皆賞之所
以勉人於不懈
右二十筭





全壺不以耦之箕數多少
全則復計其餘筭以決勝
負為山九仞功虧一簣全
之實難故君子貴之

右無筭



有終末箭也靡不有初鮮
克有終故比之有初又加
筭也


右二十筭貫耳倍之



驍箭亦謂之驍也謂投而不中箭激

反躋捷而得之復投而中者謂其已失而復得之不遠復善補過者也故賞之若復投而貫耳其筭別計後投而不中者廢之右十筭

敗壺謂十二箭俱不中大無功也若兩人皆敗則亦計餘筭以決勝負
右不問已有之筭皆負





橫耳謂箭加耳上舊五十
籌偶然而橫非投者
之功何足以賞若為後箭
所擊而墜地者與不中同

右依常筭無賞


橫壺橫加壺口舊五十籌
同橫耳

右依常筭無賞



倚竿箭斜倚壺口中舊十一
籌傾邪險誠不在于善而舊
固以為奇箭多與之籌甚無
謂也今廢其筭所以罰之亦
異於不中者故於連中全壺
皆得通數若為後箭所擊及
自墜壺若耳中者後計其筭
墜地者與不中同右廢其筭
龍首倚竿而箭首正向已
者舊十八籌同倚竿

右廢其筭





龍尾倚竿而箭羽正向已
者舊十五籌同倚竿

右廢其筭

狼壺轉旋口上而成倚竿
者舊十五籌同倚竿

右廢其筭







帶釵貫耳不至地者舊十
五籌同倚竿

右廢其筭

耳倚竿舊十五籌同倚竿



右廢其筭



倒中舊百二十籌顛倒反
覆惡之大者奈何為
上賞今盡廢其筭
所以明順逆之理

右壺中之數盡廢

倒耳舊不問籌數並滿同
倒中

右壺中之數盡廢

碁

羣書要語飽食終日無所用心難矣哉不有博奕者乎

為之猶賢乎已語博奕好飲酒不顧父母之養二不孝

也孟子斷木為碁椀草為鞠亦皆有法焉楊子胡旦曰

以碁為易則聰明者或不能以為難則愚下小人往往

精絕歸田錄

詩句珍簾疎簾看奕棋杜聞道長安似奕碁杜圍碁賭

酒到天明白圍碁闌白黑韓腹心受害誠堪懼唇齒生

憂尚可醫

康節

古今事實

堯舜教子

堯造圖棊以教子丹朱或云舜以子商均愚故作圍棊以教之其法非智不能也

博物志

奕秋誨奕

奕之為數小數也不專心致志則不得也奕秋通國之善奕者也使奕秋誨二人奕其一人專心致志惟奕之

為聽一人雖聽之一心以為有鴻鵠將至思援弓繳而射之雖與之俱學弗及之矣告子下

彈棊之戲

梁冀少為貴戚逸遊自恣嗜酒能挽滿彈棊格五六博蹴鞠意錢之戲魏文帝善彈棊能用手巾角時一書生又能低頭以所冠葛巾撒棊

韋曜戒奕

吳蔡頴亦在東宮性好博奕太子和以為無益命韋曜

戒之

臨敵圍棋

延熙中魏軍次於興勢假費禕節率衆往禦之束敏至
禕許別求共圍碁時羽檄交馳人馬擐甲嚴駕已訖禕
與敏留意對戲色無厭倦敏曰聊觀試君且君信可人
必能辦賊禕至敵遂退

王粲覆碁

魏王粲觀人圍碁局壞粲為覆之碁者不信以帊蓋局

更以他局為之用相比校不誤一道其強記默識如此

別墅圍棋

符堅率衆百萬次淮淝京師震恐加謝安征討大都督
安夷然無懼色旋命駕出別墅親朋畢集方與玄圍碁
賭別墅安碁常劣於玄是日玄懼便為敵手而又不勝
安遂顧謂其甥羊曇曰以墅乞汝遂為陟至夜乃還指
授將帥各當其任既而兄子玄等破堅有驛書至安方
對圍碁看書既竟便攝於床上了無喜色圍碁如故客

問之徐答云小兒輩已破賊既罷還內過戶限心喜甚
不覺屐齒之折其矯情鎮物如此

奕具投江

陶侃為荊州見佐史博奕具投之於江曰圍碁堯舜以
教愚子博殷紂所造諸君並國器何以此為將吏則加
鞭朴曰樗蒲者牧豬奴戲耳

觀碁爛柯

信安郡石室山晉時樵者王質伐木入山見二童子碁

與質一物如棗核食之不覺饑以所持斧置坐而觀童子指為之曰汝斧柯爛矣質歸鄉閭無復時人述異記

坐隱

王中郎以圍碁為坐隱在哀制中祥後客來即用方幅

為會戲世說

手談

支公以碁為手談世說

有瓜葛

王導嘗共其子悅圍碁爭道導笑曰相與有瓜葛亦得爾耶

推枰決策

晉武帝與中書令張華圍碁間杜預表適至華推枰歛手曰陛下聖明神武國富兵強吳之荒淫驕虛宜亟討之

圍碁應答

殷仲堪在都嘗往看碁諸從在瓦棺寺前宅上于時袁

羗與人共在窓下圍碁仲堪在裏問袁易義袁應答如
沅圍碁不輟袁意傲然殊有餘地殷撰辭致難每有往
復

西南風急

謝密與客奕密西南棋有死勢復一客曰西南風急或
有覆計密悟乃殺之南史

奕碁賭郡

南史羊元保為黃門侍郎善奕碁宋文帝亦好奕與賭

郡元保戲勝以補宣城太守

圍碁失睡

梁到溉為侍中與武帝碁達旦或復失寢加以低睡帝嘲曰狀若喪家狗又如懸風槌

周始象戲

周武帝造象戲

方圓動靜

李泌元宗馳召泌既至帝方與張說觀碁因使說試其

能說請賦方圓動靜泌曰願聞其略說曰方若棊局圓若棊子動若棊生靜若棊死

東宮侍棊

順宗為太子王叔文以善棊得侍東宮

婦姑手談

翰林棊者王積薪從明皇西幸寓宿深溪之家但有婦姑止給水火纔瞑闔戶積薪夜聞姑謂婦曰良宵無以為適與子手談可乎堂內無燭婦姑各在東西室對談

已而姑曰予已北矣吾止勝九枰耳遲明請問於姥顧婦曰是子可教以常勢耳婦乃指示攻守之法積薪自是其藝絕倫

集異記

冷暖碁子

日本國王子入貢善奕宣宗令待詔顧師言與之對王子不勝問曰此第幾手荅曰第三手王子嘆曰小國之一不及大國之三因獻玉碁局冷暖玉碁子玉性冬則暖夏則冷

奕棊諱敗

石晉陳保性極鄙吝每與人奕棊敗則手亂其局懼所賭金錢不欲與也及卒家無妻兒唯貯白金十錠為他人所有

續世說

偽為不勝

李道古便佞巧宦常以酒肴棊博游公卿門角賭之際偽為不勝而厚償之故得一時虛名而嗜利者悉與之

狎續世說

假碁濟貪

蜀簡州刺史安重霸瀆貨無厭州民有油客者姓鄧能碁其家亦膽重霸名對敵只令立侍每落一子俾其退立於西北牖下候我算路乃始進之終日不下十數子而已鄧生倦立且饑殆不可堪次日又召或有諷鄧生曰此侯好賂本不為碁何不獻賂而自求退乃獻中金

三錠獲免

北憲瑣言

挾詐常輸

蘇子瞻云太宗時有待詔賈元者常侍上暴太宗饒元
三子元常輸一路太宗知元挾詐不盡其藝也乃謂之
曰此局汝復輸我當榜汝既而滿局不生不死太宗曰
汝亦詐也更圍一局汝勝賜汝緋不勝當投汝於泥中
既而局平不勝不負太宗曰我饒汝子今而局平是汝
不勝也令左右抱投之水乃呼曰臣握中尚有一子太
宗大笑賜以緋衣

荆公詩註

暴子役心

丁晉公好釋教又酷嗜奕碁中堂退食對局以夜繼日
一日問李昉虛心之法對曰請侍中弼諧之外勿於碁
子役心虛已半矣公曰如子之言何止於碁凡有所著
則不虛矣 該閒錄

不能著碁

林和靖每曰通世間事皆能之唯不能擔糞與著碁 墨客

揮犀

古今文集

雜著

奕旨

班固

北方之人謂棊為奕局必方正象地則也道必正直神明德也棊有黑白陰陽分也駢羅列布效天文也四象既陳行之在人蓋王政也或虛設豫置以自衛護蓋象庖犧網罟之制隄防周起障寒漏決有似夏后治水之勢一孔有闕頽壞不振有似瓠子汎濫之敗作伏設詐突圍橫行田單之奇要厄相刼割地取賞蘇張之姿參

分有勝怨而不誅周文之德逡巡儒行保角依旁却自補續雖敗不亡繆公之智上有天地之象次有帝王之治中有五霸之權下有戰國之事覽其得失古今略備

原奕

皮日休

問奕之原於或人或人曰堯教丹朱征丹朱作為是信固有其道焉皮子曰夫奕為藝也彼謀既失我謀先之我智既虧彼計乘之害也欲利其內必先攻外欲取其遠必先攻近詐也勝之勢不城池而金湯焉負之勢不

兵甲而奔北焉勝不讓負負不讓勝爭也存此免彼存
彼失此如蘇秦之合從陳軫之游說偽也若然者不害
則敗不詐則亡不爭則失不偽則亂是奕之必然也雖
奕秋荐出必用吾言焉嘗試論之夫堯之有仁義禮智
信性也如生者必能用手足任耳目者矣豈區區出其
纖謀小智以著其術用爭勝負哉堯之世三苗不服以
堯之仁苗之慢堯兵而燬之由羅人殺鵩鷗廩人烹鯢
鮓者矣然堯不忍加兵而以命舜舜不忍伐而敷之丈

德然後有苗格焉以有苗之慢尚不加兵豈能以害詐之心爭偽之智用為戰法教其子以伐國哉則奕之始作必起自戰國有害詐爭偽之道當從橫者流之作矣
豈曰堯哉豈曰堯哉

序碁

柳宗元

房生直溫與余二弟游皆好學余病其確也思所以休息之者得木局隆其中而規焉其下方以直置碁二十有四貴者半賤者半貴曰上賤曰下咸自第一至十二

下者二乃敵一用朱墨以別焉房由是取二毫如其第
書之既而抵戲者二人則視其賤者而賤之貴者而貴
之其使之擊觸也必先賤者不得已而使貴者則皆慄
焉惛焉亦鮮克以中其獲也得朱焉則若有餘得墨焉
則若不足余諦視之以思其始則皆類也房子一書而
輕重若是適近其手而先焉非能擇其善而朱之否而
墨之也然而上焉而上下焉而下貴焉而貴賤焉而賤
其易彼而敬此遂以遠焉然則若世之所以貴賤人者

其異房之貴賤於茲碁者歟其所謂貴者有敢輕而使
之擊觸者歟其所謂賤者有敢避而使之擊觸者歟彼
朱而墨者相去千萬且不啻有敢以二敵其一者歟余
墨者徒也觀其始與未有似碁者故序

博奕論

見博門

圍碁賦

馬融

略觀圍碁法於用兵三尺之局為戰鬪場陳聚士卒兩
敵相當怯者無功貪者先亡當據四道守用依傍緣邊

遮列往往相望離離馬目連連雁行蹕度間置徘徊
中央收取死卒無使相迎當食不食反受其殃離亂
交錯更相度越守規不固為所唐突深入貪地殺亡
士卒狂攘相救先後并沒計功相除以時早訖事留
變生拾棊欲疾營或窘之無令詐出深念遠慮勝乃
可必

古詩

用韻戲贈葉致遠直講

王介甫

葉侯越著姓胄出實楚葉縉雲雖窮遠冠蓋傳累葉心
大有所潛肩高未嘗脅飄飄凌雲意強禦莫能懾辟雍
海環流用汝作舟楫開胸出妙義可發蒙起饜調如大
阿峯誰敢觸其缺聽之心凜然難者口因嚼搏飛欲戕
我鍛墮今跼跼忘情塞上馬適志夢中蝶若金靜無求
在治惟所挾載醪惟彼惑饋漿非我課經綸安所施有
寓聊自愜綦經著在手綦訣傳滿篋坐尋綦局打側寫
綦圖貼攜持山林屐刺擿溝港艤一枰嘗自副當熱寧

忘筭反嗤襌襪子但守一經笈亡羊等殘生朽筭何足
摺歡然值手敵便與對已笑縱橫子墮局脇膊聲出堞
樵夫弛遠擔牧奴停晏饁旁觀各技癢切議兒女躡所
矜在得喪聞此更心慄孰視籠兩手徐思撚長鬣微吟
靜惛惛堅坐高帖帖未決巖谷叟斧柯掌爛浥趨遑耻
局縮穿腹愁危業或撞闕以攻或覷眼而摩邊腹闕眼
皆基訣也
或羸行伺擊或猛出追躡垂成忽破壞中斷俄連接或
外示閑暇伐事先和燮或冒突超越鼓行令震疊或粗

見形勢驅除令遠蹠或開拓疆境欲并包總攝或僅殘
尺寸如黑子著靨或橫潰解散如尸僵血喋或慙如告
亡或喜如獻捷陷敵未甘虜執仇方借使諱輸寧斷頭
悔悟乃批頰終已疲精神既夜未交曉翻然悟且歎此何
宜叔叔孟軻惡妨行陶侃懲廢業揚雄有前言韋曜存
往課晉臣抑帝手援侯何啻涉

定公八年涉亡援
衛侯之手衛侯怒

冶城

子爭道拒父乃知輒爭也實逆德豈如和闐怯藝成况
窮苦此殆天之厭如今劉與李倫等安可躡試令取一

毫亦乏寸金鑷以此待君子未與回參協操具投諸江
道耕而德獵

觀棊歌送

劉禹錫

自從仙人過樵子直到開元王長史前身後身付餘習
百變千化無窮已初疑磊落曙天星次見搏擊三秋兵
雁行布陣衆未曉虎穴得人皆驚行盡三湘不逢敵
終日饒人損機格藹藹京城在九天賭取聲名不要錢

楊子美談棊局歌

劉貢父

漢皇初獻感鞠勞侍臣始作彈碁戲東方諸公盛得名
魏文邇來稱絕技後宮粧奩仍可為客著葛巾尤更奇
誰令朱墨異貴賤百世紛紛無已時君從何處得此局
石理溫華瑩寒玉山形四隕澗谷深別將望秦森在目
少年博戲日益新古事不復傳今人君能興此亦先覺
辟雍老儒悲絕學

律詩

池上

劉貢父

山僧對碁坐局上竹陰清映竹無人見時聞下子聲

觀碁

邵堯夫

未去交爭意難忘勝負心一條玄路妙徹了沒人尋

寄碁客

鄭谷

松窻秋局穩相顧思皆凝幾局賭山墅一先饒海僧覆
圖聞夜雨下子對秋燈何日無羈束期君向杜陵

觀碁

杜荀鶴

對面不相見用心如用兵算人常欲殺顧已自貪生得

勢侵吞遠乘危打劫羸有時逢敵手當局到深更

碁

裴說

十九條平路言平又險巖人心無算處國手有輸時勢
過流星遠聲乾下電時臨軒纔一局寒日又西垂

碁

高輦

野客圍碁坐楮頤向暮秋不言如守默設計似平讐決
勝雖關勇防危亦合憂看他終一局白却少年頭

觀碁

陳元興

黑白旋盈盤分途各占寬縱高無盡幸遇敵始知難對
面心千里藏機勢萬般寄言當局者踈失早須看

奕基

洪玉父

荆璞玉為子井文楸作枰有求唯別墅不喜得宣城跼
跼飛鳶墮丁丁伐木聲破愁逢一笑無地著虧成

又

不作丹朱戲難禁清晝長敢言白玉局聊取紫羅囊角
道空傳寄乘除自有方兒童爭畫紙謾學老夫狂

又

眉山非快手奕興亦欣然變態一翻覆幾微係後先陶
公慮太過雪女慧堪憐張弛誠吾道斯文許爾賢

棊

王介甫

莫將戲事擾真情且可隨緣道我羸戰罷兩奩收白黑
一枰何處有虧成

送國棊王逢

杜牧

玉子紋楸一路饒更宜簷雨竹蕭蕭羸形暗去春泉長猛

勢橫來野火燒守道還如周伏柱鏖兵不羨霍嫖姚得
年七十更萬日與子期於局上銷

碁

歐陽炯

碁理還將道理通為饒先手却由衷古人重到今人愛
萬局都無一局同靜算山川千里近閑銷日月兩輪空
誠知此道剛難進況是平生不著功

奕碁

黃魯直

偶無公事客休時席上談兵校兩碁心似蛛絲游碧落

身如蜩甲化枯枝
湘東一目誠甘死
天上中分尚可持
誰謂吾徒猶愛日
參橫月落不曾知

因與西廳參政侍郎奕棊子輸
紙筆硯三物
以詩見徵
屬宣毫適盡
但送蜀牋
端硯繼以

此章

楊大年

多年燥吻蒼苔砌
禿盡江南石上毫
五色蠻牋猶有剩
一拳端石豈勝勞
蕭齋幸遇談賓末
謝墅深降奕思高
微物供堂正
猶豫丹青筆下枉風騷

又以建茶代宣筆別書一絕

楊大年

青管演綸都已竭文楸爭道恨非高輒將北苑先春茗
聊代中山墮月毫

象戲

程伯淳

大都博奕皆戲劇象戲翻能學用兵車馬尚存周戰法
偏裨曾備漢官名中軍八面將軍重河外斜尖步卒輕
却凭文楸聊自笑雄如劉項亦閑爭

詩話

奕棋廢事

令狐相薦李遠為杭州宣宗曰聞李遠有詩云長日惟消一局碁此可使治郡耶對曰詩人之言不足實也乃薦遠廉察可任

賦觀碁詩

宜春王從謙李璟之第九子好學善為詩璟於苑中與宰相奕碁從謙在焉令賦觀碁詩曰竹林二君子盡日

意沉吟相對雖無語爭先各有心恃強知易失守分固
難侵若算機籌處滄溟想未深

江南野錄

人遲已速

仁廟時有李重恩善奕碁冠絕當世然形神昏憊時人
謂之李憨奕碁之外一無所曉與人對奕坐而昏睡人
精思久之方下一子重恩開目隨手應之皆出人意表
善品碁者以為重恩在王積薪之上賈玄之下荆公詩
嘗用之

忘情苦思

介甫有絕句云莫將戲事擾真情且可隨緣道我贏則
圖適性忘慮之證信有之矣若魯直於棊則不然如心
似蛛絲游碧落身如蜩甲化枯枝則苦思忘形較勝負
於一著與介甫措意異矣

漁隱叢話

輸棊賦詩

荆公在鍾山下棊薛昂門下與焉賭梅花詩一首薛敗
而不善作荆公為代作今集中所謂薛秀才者是也薛

既官達出知金陵或者嘲以詩曰好笑當年薛乞兒荆
公座上賭梅詩而今又向江東去奉勸先人莫下碁薛
書名似丐字故人有乞兒之說

吳曾說

荆公碁低

荆公碁品殊下每與人對局未嘗致思隨手疾應覺其
勢將敗便歛之曰本圖適性忘慮反苦思勞神不如且
已與葉致遠敵手嘗贈葉詩有垂成中斷之句是知公
碁不甚高詩又云諱輸寧斷頭悔悟仍批頰是又未能

忘情于一時之得喪也

遯齋閑覽

作棊隱語

荆公在鍾山與道士下棊道士作數語曰彼亦不敢先此亦不敢先是以無所爭故能入于不死能入于不死不生公笑曰此棊隱語也

冷齋夜話

聞落子聲

東坡云余素不解棊嘗獨遊廬山白鶴觀觀中人皆闔戶晝寢獨聞棊聲於古松流水之間意欣然喜之自爾

欲學然終不解也兒子素乃粗能者儻守張中立從之
戲余亦隅坐竟日不以為厭也因作詩云五老峰前白
鶴遺址長松蔭庭風日清美我時獨遊不逢一士誰與
棊者戶外屨二不聞人聲時聞落子紋楸坐對誰究此
味空鉤意釣豈在魴鯉小兒近道剝啄信指勝固欣然
敗亦可喜優哉遊哉聊以卒歲

就枕閱棊

東坡云南嶽李巖老好睡衆人食飽下棊巖老輒就枕

閱數局乃一展轉云我始一局君幾局矣東坡云巖老
嘗用四脚碁盤著一色黑子昔與邊韶敵手今被陳搏
饒先著時自有輸贏著了竝無一物歐公詩云夜涼吹
笛千山月路暗迷人百種花碁罷不知人換世酒闌無
奈客思家殆類是也

升坐說碁

僧寶傳云浮山法遠禪師歐公造其室以與客碁遠坐
其傍歐公收局請遠因碁說法乃鳴鼓升坐曰若論此

事如兩家著碁相似何謂也敵手知音當機不讓若是
綴五饒三又通一路始得有一般底祇解閉門作活不
會奪角衝關硬節與虎口齊張局破後徒勞遑幹所以
道肥邊易得瘦肚難求思行則往往失粘心麓則時時
頭掉休誇國手謾說神仙羸局輸籌即不問且道黑白
未分時一著落在什麼處良久云從前十九路迷誤幾
多人歐公嘉歎久之

古今事文類聚前集卷四十二